

A invita
hungadonan estelar
di Major League
Baseball

"ALL STAR CELEBRITY BASEBALL" PA REAPERTURA DI JOE LAVEIST SPORT PARK

Dianan 27, 28 y
29 di november
proximo



ANTONIO "Joselito" Albertsz, coordinador di e "Celebrity Baseball Madness" den cual lo figura hungadonan di MLB di Merca, ta impresiona cu e facilidad renoba di Joe Laveist Sport Park.

E ta na Aruba den preparacion p'e evento grandi di reapertura, programa pa dia 28 di november 2015.

Joselito Albertsz a sigura cu ta despues di 12 aña cu ta topa atrobe den e mesun facilidad y planeando pa organisa e mesun evento, e "All Star Celebrity Baseball" anto rib'un veld completamente nobo.

Ya caba e comision organizado a manda no menos di 35 invitacion na hungadonan estelar di baseball, entre otro e beisbolista Dominicano Vladimir Carera, kende a hunga baseball major league pa mas di 12 aña, e ta retira y tin famia bibando na Aruba.

A invita hungado tambe di Venezuela, Puerto Rico, di Merca y hasta for di hungadonan estelar procedente di Corsou hungando Major League.

Ta bon pa enfatisa cu un cantidad di e hungadonan invita ta activo ainda, por lo menos 7 di nan ta den playoff awor aki y lo haci tur esfuerso pa bini nos isla p'e evento di reapertura di Joe Laveist Sport Park. Ta pendiente pa nan agenda pa acomoda nos isla riba nan itinerario.

E hungadonan invita ta procedente di New York Yankees, Baltimore Orioles, Los Angeles Dodgers, Atlanta Braves, Colorado Rockies, etc. Tur ta nombrenan grandi y algun cu hasta a haci historia e aña aki den Major League Baseball.

Si tur cos sigui rib'e rumbo aki, ta spera di por logra atrae por lo menos 15 di e hungadonan

aki, cu probablemente lo yega Aruba cu algun fanatico, famia y nan staf tecnico.

Tur cos ta muestra cu expectativanan ta masha halto pa reapertura di Joe Laveist Sport Park, cu un cantidad di evento durante henter fin di siman y cu presencia di varios hungado estelar di baseball internacional, hunto cu nos propio veteranonan den baseball.

Riba dia 28 di october proximo lo haci e anuncio oficial di e weganan di "All Star Celebrity Games", den cual tur fondo recauda lo bay pa Pony League Aruba, pa yuda nan yega na ekiponan y pa yuda teamnan participa den weganan internacional.

Ta invita henter Aruba pa ta pendiente pa reapertura di Joe Laveist Sport Park, durante un fin di siman di eventonan, riba dianan 27, 28 y 29 di november 2015.